

■ COLUMNA

Pli serius che quai ch'ins crai

DA BERNARD CATHOMAS

Enfin ils 7 da matg avain nus Svizras e Svizzers duvrà da la natira tut quai che tutga a nus per l'entir onn. Dapi lura vivin nus sin donn e cust da las generaziuns futuras e dad autras regiuns dal mund che vivan pli ecologic che nus. Nus sgulain trais giadas dapli ch'auters, nus charrain cun ils pli grevs autos da l'entira Europa, nus producim il pli bler ruement. Per di e persuna chaschunain nus 20 giadas dapli CO₂ che quai che nus duessan.

Questas cifras vegnan da l'Uffizi federal per statistica che sa basa sin experts internaziunals. Sche tuts vivessan sin quest mund sco nus duvrassi mintg'onn trais planets per mantegnair la substanza a lunga vista. La chaussa è fitg seriusa. Mo nus fashain sco sche tut fiss normal.

Nus vivin da la natira. Quai emblid'ins magari sch'ins po cumprar tut quai ch'ins dovra, sch'ins viva en chasas che protegian da tuttas auras ed abitescha en regiuns privilegiadas sco nus. Dapi decennis essan nus carstgauns vid destruir las basas da noss'existenza. La biodiversità svanescha pli e pli, las mars vegnan explotadas, il terren fritgaivel tissientà,



l'aria impestada. Tar nus ves'ins oz anc pauc da quai. Tuttina: I constat.

Cun il verms svanescha er il carstgaun» stevi scrit questa primavaira sin in transparent en in til da protest da giuvnas e giuvens. Er nus umans essan la finala mo ina da las millis specias ed essan dependents dad autras specias, schizunt dals insects, din ils experts.

Ils manifestes e las demonstraziuns da la giuventetgna han destadà la politica. Ils liberals sa dattan dapi in pèr mais precautain colur verda. Mirveglias, tge accziuns concretas che confirman lur plets. La pps pretenda senza retgnientschas ch'ella saja – cun blers purs en sias retschas – già adina stada verda, er sche quai na sa mussa uschè cler ni en sias decisiuns ni en il cumportament da tut ils purs. Cristiandemocrats e cristiansocials san dapi decennis ch'i tutga tar las obligaziuns

fundamentalas dad ina partida cun il C en il num da s'engaschar per mantegnair la scaffiziun. Cler ch'ils cotschens èn verds. En l'Europa mussan dentant ils verds cun grond success che mo l'original persvada per propi.

Verd è actual, dentant betg gratuit. Esser verd vul dir sa restrenscher, renunziar sin sgols e bler auter che chargia l'ambient. Verd custa. Ma verd crescha er plazzas da lavur. Per esser propi verd stuess er jau midar in pèr chaussas che faschessan mal. Quai fan ins mo sch'ins sto, mo sch'ins vegn obligà. Per esser sincer: Facultativ na funcziuni betg. I dovra cumonds. E cumonds pretendan curaschi en ina societad libra nua che mintgin stat sin sias libertads.

Il 21avel pudess d'entantar il tschientaner verd. Suentar il 20avel cun las terriblas guerras ed ils genozids sgarschaivels ina perspectiva legraivla. Sperain ch'i restia anc temp avunda da far las midadas avant ch'ils glatschers polars lieuuan, la mar crescha e chatscha ina milliarda fugitivs ecologics en regiuns segiras, chaschunond conflicts apocaliptics. Quels che predin che quai vegnia a succeder, sche nus na tirain oz las consequenzas, han fitg ferm arguments.